



আসলে যখন আল্লাহ আকাশ ও পৃথিবী সৃষ্টি করেছেন তখন থেকেই আল্লাহর লিখন ও গণনায় মাসের সংখ্যা বারো চলে আসছে। এর মধ্যে চারটি হারাম মাস। এটিই সঠিক বিধান।

-আল-তওবা (আয়াত ৩৬ / আংশিক)

## স্বাগতম হিজরি ১৪৪২!

নবীর উম্মাত হিসেবে আমরা ইতিহাসকে দেখবো হযরত মুহাম্মদ সাল্লাল্লাহু আলাইহি ওয়াসাল্লামের জীবন-ইতিহাসের আলোকে। আর তা হল মানব-সভ্যতার ইতিহাসে সেই নতুন অধ্যায় যা শুরু হয়েছে নবীজির জন্ম থেকে - হিজরতের আগে এবং পরে।

আমাদের জীবন তাই আবর্তিত হোক - চন্দ্র মাসগুলোর হিসেবে। হয়তো জীবনের সকল ক্ষেত্রে এটি বাস্তবায়ন সম্ভব না হতে পারে, তবুও আসুন এবাদত আর আত্ম-উন্নয়নের ক্ষেত্রে আমরা চন্দ্র মাসগুলোকে জীবনের সাথী বানিয়ে নেই।

হিজরি সন শুরু হয় হিজরাহ ও ইব্রাহীম (আঃ) এর ত্যাগ ও কোরবানীর চেতনা দিয়ে এবং শেষও হয় একই চেতনায়।

ইসলামী বছর ইসলামের কোন আড়ম্বর ও গৌরবের বিষয় নয় বরং প্রতিবছর মুসলমানকে তার ত্যাগের কথা স্মরণ করিয়ে দেয় এবং তাদের প্রস্তুত করে তোলে একই কাজ করতে।

হিজরি বর্ষের শুরু কারও জন্মদিন, বা কোনও রাজা বা শাসকের আদেশ থেকে নয়- ইসলামী শিক্ষা, দ্রাতৃত্ব ও ঐক্যের ভিত্তিতে আমরা এটি শুরু করি এবং শেষ করি।

ইসলামী বিধিবিধান প্রতিপালন ও পরিকল্পিত সন গণনার প্রয়োজনেই মূলত হিজরি সনের উদ্ভব ঘটে।

## হিজরি বর্ষের বৈশিষ্ট

মুহাম্মাদ (সা:) মক্কার কাফেরদের ষড়যন্ত্রের কারণে মক্কা ছেড়ে মদিনা চলে যান। যা হিজরত নামে পরিচিত। এই হিজরতের সময় থেকে হিজরি সাল গণনা শুরু করেন।

যদিও প্রিয়নবী সাল্লাল্লাহু আলাইহি ওয়া সাল্লাম মদিনায় পৌঁছেন রবিউল আওয়াল মাসে। কিন্তু হিজরতের পরিকল্পনা হয়েছিল নবুওয়তের ১৩ তম বর্ষের হজের মৌসুমে। সময়টি ছিল মদিনার আনসারি সাহাবাদের সঙ্গে আকাবার দ্বিতীয় শপথ সংঘটিত হওয়ার পর। তখন ছিল জিলহজ মাসে। আর তার পরের মাসই হলো মহররম।

হিজরি সন যদিও দ্বিতীয় খলিফা হজরত ওমর (রা.)-এর নির্দেশে তাঁরই যুগ থেকে আনুষ্ঠানিকভাবে প্রচলিত হয়ে আসছে কিন্তু প্রকৃতপক্ষে এর গণনা শুরু হয়েছে মহানবী হজরত মুহাম্মাদ (সাঃ)-এর হিজরতের সময় এবং হিজরতের পরিকল্পনাকে ও নির্দেশনাকে কেন্দ্র করেই।

**হিজরি সন শুরু হল হিজরতের বছর গণনা করে -১৬ জুলাই, ৬২২ = ১ মহররম, ১ হিজরি**

আনুষ্ঠানিকভাবে ৬৩৯ খ্রিস্টাব্দ থেকে হিজরি সন চালু হয়। মুসলিমবিশ্বে চন্দ্র পরিক্রমার সাথে সম্পর্কিত হিজরি সন অতি পবিত্র, মহিমান্বিত ও মর্যাদাপূর্ণ সন। প্রায় দেড়শত কোটি মুসলিমের কাছে এই হিজরি সনের গুরুত্ব অপরিসীম। মুসলিম উম্মাহর ঐতিহাসিক সাল গণনায় হিজরি সন এক মহান ঘটনার স্মারক।

ইসলামের বিভিন্ন বিধিবিধান হিজরি সন তথা আরবি তারিখ ও চন্দ্রমাসের সঙ্গে সম্পর্কিত। ধর্মীয় আচার-অনুষ্ঠান, আনন্দ-উৎসবসহ সব ক্ষেত্রেই মুসলিম উম্মাহ হিজরি সনের উপর নির্ভরশীল। তারিখ শব্দটি আরবি যার প্রচলিত অর্থ ইতিহাস, বছরের নির্দিষ্ট দিনের হিসাব।

আল্লামা ইবনে মানজুর (রহ.) তাঁর বিখ্যাত আরবি অভিধান 'লিসানুল আরবে' লিখেছেন, 'তারিখ হলো সময়কে নির্দিষ্ট করা, সময়ের চিত্র তুলে ধরা, সময়ের ঘটনাপ্রবাহকে শব্দবদ্ধ করা। আবার কেউ কেউ বলেছেন তারিখ শব্দটি অনারবি। 'মা' ও 'রোজ' থেকে পরিবর্তন করে একে আরবিতে রূপান্তর করা হয়েছে যার অর্থ-দিন, মাস ও বছরের হিসাব।

হিজরি সন গণনা কোনো ব্যক্তির জন্ম বা মৃত্যু তারিখ থেকে শুরু হয়নি-বরং ইহা বিশেষ মর্যাদাপূর্ণ হিজরতের সঙ্গেই সম্পর্কিত। হিজরতের ঐতিহাসিক ঘটনাকে স্মারক বানিয়ে ইসলামের দ্বিতীয় খলিফা হজরত ওমর (রা.) হিজরি নববর্ষের গোড়াপত্তন করেন। তিনিই সর্বপ্রথম মুসলমানদের জন্য পৃথক ও স্বতন্ত্র চন্দ্রমাসের পঞ্জিকা প্রণয়ন করেন।

হিজরি সন ইসলাম পুনর্জাগরণের প্রধান ও অবিসংবাদিত প্রতীক এবং মুসলমানদের বিজয় ও সাফল্যের এক জ্বলন্ত ইতিহাস। উজ্জ্বল অমর কীর্তি ও চিরন্তন ঐতিহ্য। এ ঐতিহ্যবাহী হিজরি সনের অনুসরণ করে গোটা ইসলামী জাহান মুসলিম উম্মাহর সঠিক ও শাস্ত্র অনুভূতির প্রতি শ্রদ্ধা প্রদর্শন করে মনজিলে মাকসুদের প্রতি এগিয়ে যাওয়ার অনুপ্রেরণা পায়।

যেহেতু আল্লাহ সূর্য, চাঁদ ও পৃথিবী সৃষ্টি করেছেন, তখন থেকে মাসে একবারে নতুন চাঁদ দেখা যায়; এভাবে বছরটি বারো মাস হয়ে থাকে।

## চন্দ্র-মাসের বৈশিষ্ট

- চন্দ্র-মাসের শুরু চাঁদের উপর ভিত্তি করে যা নির্ভুল ও দৃশ্যমান ;
- আল্লাহর আদেশের কাছে প্রকৃতির আত্মসমর্পণ ও সৃষ্টির সৌন্দর্যের স্মারক;
- চাঁদের অপূর্ণতা ও পূর্ণতা , এটিতো সূর্যের আলোর উপর নির্ভর। আমরা তাই প্রতি মাসে অমাবস্যার সন্ধান করি, অধীর আগ্রহে আপেক্ষা করি নতুন চাঁদের জন্যে- এ এক স্বর্গীয় আনন্দ ;
- চাঁদের অপূর্ণতা ও পূর্ণতা প্রাকৃতির প্রতিটি প্রাণী, সমুদ্র, মহাসাগর, উদ্ভিদ এমনকি মানুষের জীবনের সাথে জড়িত।
- চন্দ্র-মাসগুলো গতিশীল- গ্রীষ্মটি কেবল ইংরাজি জুন মাসে দেখি না, শীত শুধু জমাদিউল আউয়ালে নয়। জাতি হিসেবে আমরা সকল মাস এবং ঋতুর জাতি- সব চ্যালেঞ্জকে মেনে নিতে পারি।

## ইসলামী মাসগুলো নামের অর্থ ও প্রেক্ষাপট

মহাররম এমন এক মাস যা দিয়ে মুসলমানরা তাদের চন্দ্র হিজরি ক্যালেন্ডার শুরু করে। এটি চারটি পবিত্র মাসের একটি। এই চার মাস যথাযথ এতিহ্য অনুসারে জ্বিলকদ, জ্বিলহজ্জ, মুহাররম ও রজব। এই চার মাসের সুনির্দিষ্ট উল্লেখের অর্থ এই নয় যে অন্য কোনও মাসের কোনও পবিত্রতা নেই।

উল্লেখিত চার মাসের মধ্যে রমজানের উল্লেখ না থাকলেও রমজান মাসটি স্বীকৃতভাবে বছরের মধ্যে সবচেয়ে পবিত্র মাস। প্রকৃতপক্ষে, হিজরি বর্ষের প্রতিটি মাসের গুরুত্ব সমান। মহান আল্লাহ তায়ালা যখন তাঁর বিশেষ নিয়ামতের জন্য নির্দিষ্ট সময় বেছে নেন, তখনই তাঁর অনুগ্রহে কোন একটি মাস বিশেষ গুরুত্ব ও পবিত্রতা অর্জন করে।

### ১. মুহাররম

মুহাররম কে মুহাররমুল হারাম বলা হয়। এই নাম রাখা হয়েছিল জাহেলিয়াতের যুগে। মূলত সেই সময় এই মাসে সকল প্রকার যুদ্ধ-বিগ্রহ ও রক্তপাত করা হারাম তথা অবৈধ ছিল। আর এই কারণে একে মুহাররমুল হারাম রাখা হয়।

### ২. সফর

সফর আরবি দ্বিতীয় মাস। 'সিফর' ধাতু থেকে সফর শব্দটি উৎপন্ন। সিফর শব্দের অর্থ শূন্য হওয়া। জাহেলিয়াতের যুগে মুহাররম মাসে যুদ্ধ-বিগ্রহ হারাম ছিল। কিন্তু সফর মাসে আবার তারা যুদ্ধ বিগ্রহ করা শুরু করতো। যেহেতু সফর মাসে যুদ্ধের জন্য বের হয়ে যেত এবং তাদের বাড়ী গুলো শূন্য হয়ে পড়ে থাকত। তাই এই মাসকে সফর নামকরণ করা হয়।

আরেকটি মত হলো, সফর শব্দটির উৎপত্তি হয়েছে সুফর ধাতু হতে। সুফর অর্থ হলো হলদে বর্ণ। মাসের নামকরণ করার উদ্যোগ নেওয়া হয় তখন ছিল গাছের পাতা ঝরার ঋতু আর পাতা ঝরার পূর্বে পাতার রং হলদে রং ধারণ করতো। তাই তখন এই মাসের নাম সফর রেখে দেয়া হয়।

### ৩. রবিউল আওয়াল

সফর মাসে যেহেতু পাতা ঝরার ঋতু ছিল আর পাতা ঝরার ঋতুর পর আসে বসন্ত। রবিউল আওয়াল মাসের নাম রাখার উদ্যোগ যখন নেয়া হয় তখন হিসাব অনুযায়ী এই মাস ফসলে রবি অর্থাৎ বসন্তকালের শুরুতে পড়ে যায় তাই এই মাসের নামকরণ করা হয় 'রবিউল আওয়াল'। রবিউল আওয়ালকে প্রথম বসন্ত বলা যায়।

### ৪. রবিউস সানি

রবিউস সানি কে রবিউল আখিরও বলা হয়। এই মাসের নামকরণ করার সময় দেখা গেল এটি বসন্ত কালের শেষ সময় তাই এর নাম রবিউল সানি রাখা হয়। রবিউস সানির অর্থ দ্বিতীয় বসন্ত।

## ৫. জমাদিউল আউয়াল

জমাদিউল আউয়াল শব্দের অর্থ প্রথম শুকনো ভূমিখণ্ড। জমাদিউল আউয়ালকে জুমাদাল উলাও বলা হয়। জুমাদা শব্দটির উৎপত্তি জুমুদ ধাতু থেকে যার অর্থ হলো জমে যাওয়া, স্থবির হওয়া ইত্যাদি। আর উলা শব্দের অর্থ প্রথম। এই মাসের নামকরণের সময় শীত কাল ছিল। শীত কালে সব কিছু স্থবির বা জমে যায় তাই একে জমাদিউল আউয়াল বলা হয়।

## ৬. জমাদিউস সানি

জমাদিউস সানি শব্দের অর্থ দ্বিতীয় শুকনো ভূমিখণ্ড। এটা আরবের গ্রীষ্মকালের শুরু বলা যেতে পারে এবং শীতের শেষ। আর শীতের সময় পানি যেমন একদম জমে যায় অপর দিকে গ্রীষ্মে যেমন পানি শুকিয়ে যায় আর তাই এই মাসকে জমাদিউস সানি বলা হয়।

## ৭. রজব

রজব শব্দটি তারজীব হতে উৎপত্তি। তারজীব শব্দের অর্থ সম্মান, শ্রদ্ধা করা। আরববাসীরা এই মাসকে আল্লাহর মাস বলত এবং এর সম্মান করত তাই এই মাসের নাম রজব রাখা হয়।

রজব শব্দের অন্য আরেকটি অর্থ সরিয়ে রাখা। এই মাসে আরবে যুদ্ধ নিষিদ্ধ ছিল ফলে তারা বর্ষার মাথা সরিয়ে রাখতো তাই এই মাসকে রজব মাস বলা হয়।

## ৮. শাবান

শাবান শব্দের উৎপত্তি শাব হতে। এর অর্থ বিক্ষিপ্ত, বের হওয়া, প্রকাশ হওয়া, বিদীর্ণ হওয়া। এই মাসে বিপুল কল্যাণ প্রকাশিত ও প্রসারিত হয়, মানুষের রিজিক বণ্টন হয় এবং তকদীরই ফয়সালা বণ্টন করা হয় তাই এর নাম শাবান রাখা হয়েছে। এছাড়া আর একটি মত হলো, আরবের লোকেরা এই মাসে পানির সন্ধানে আরবের চারদিকে ছড়িয়ে যেতো। যার ফলে এর নাম শাবান রাখা হয়।

## ৯. রমজান

রমজান শব্দের অর্থ দহন, জ্বালানো, পুড়ানো। এই মাসে মুমিনের গুনাহ সমূহ জ্বালিয়ে পুড়িয়ে শেষ করে দেয়, তাই এর নাম রাখা হয়েছে রমজান। এছাড়া রমজান মাসে নফসের কষ্ট ও জ্বলনের কারণ হয়, তাই এর নাম রাখা হয় রমজান। রমজান মাসে মুসলমানরা রোজা রাখার দ্বারা দুনিয়াবি লোভ লালসা থেকে দূরে থাকে। এই মাসে কুরআন নাজিল হয়েছিল।

## ১০. শাওয়াল

শাওয়াল শব্দের অর্থ উত্থিত। শাওয়াল শব্দটি শাওল ধাতু হতে নির্গত। শাওল অর্থ বাহিরে গমন করা। আরবের লোকেরা এই মাসে ভ্রমণের উদ্দেশ্যে বাড়ি ছেড়ে বের হতো। তাই এই মাসের নাম রাখা হয় শাওয়াল। আবার অনেকের মতে এই সময়ে স্ত্রী উট লেজ উত্থিত করে বাচ্চা প্রসব করতো যার কারণে এই মাসের নাম শাওয়াল রাখা হয়।

## ১১. জ্বিলকদ

জ্বিলকদ শব্দের অর্থ সাময়িক যুদ্ধ বিরতির মাস। জ্বি অর্থ ওয়ালা আর কাদাহ অর্থ বসা। মাসটি আশহুরে হুরমের অর্থাৎ যে মাসগুলোকে বিশেষ সম্মান করা হয় সেই মাসগুলোর অন্তর্ভুক্ত তাই আহলে আরবরা এই মাসে যুদ্ধ বন্ধ করে বাড়িতে বসে থাকতো। এই কারণেই এই মাসের নাম জ্বিলকদ রাখা হয়। তবে এই মাসে আরবদের যুদ্ধ করা নিষিদ্ধ হলেও আত্মরক্ষার জন্য যুদ্ধ করার নিয়ম ছিল।

## ১২. জ্বিলহজ্জ

জ্বিলহজ্জ শব্দের অর্থ হজ্জের মাস। হাজ্জাহ হতে জ্বিলহজ্জ শব্দটি নেয়া। হাজ্জাহ অর্থ একবার হজ্জ করা। আবার এর মূল হিজ্জ হতেও নেয়া হতে পারে। কেননা হিজ্জ অর্থ বছর। যেহেতু এই মাস বছরের একদম শেষে আসে এবং এর মাধ্যমে বছরের সমাপ্তি হয় তাই এই মাসের নামকরণ করা হয়েছে জ্বিলহজ্জ।

আরবদের নিয়ম অনুযায়ী এই মাসেও যুদ্ধ নিষিদ্ধ ছিল।

এছাড়া মুসলমানদের জন্য এই মাস গুরুত্বপূর্ণ এই মাসে হজ্জ করা হয় এবং ঈদুল আযহা পালন করা হয়।